

Hab Inovasi Komanwel bantu negara membangun dalam perkongsian data
AstroAwani
19 Februari 2020

KUALA LUMPUR: Hab Inovasi Komanwel atau Commonwealth Innovation Hub yang diwujudkan dua tahun lalu, bukan sahaja berperanan sebagai platform perkongsian data antara negara anggota, tetapi juga disasarkan untuk membantu negara-negara membangun memahami kepentingan data empirikal.

Data empirikal, yang memberi penekanan kepada praktikal melebihi teori, penting dalam pembentukan polisi kritikal sesebuah negara.

"Negara-negara ini ada kemahuan politik, mereka mahu melunaskan 17 sasaran pembangunan Komanwel.

"Kerana itu kita wujudkan Hab Inovasi Komanwel. Tetapi mereka tidak ada pengetahuan tentang perkongsian data.

"Hab ini tidak mempunyai wang, tetapi kami mempunyai bakat-bakat besar dan rakan kongsi. Jadi kami berbincang dengan semua yang mempunyai sumber data terbuka, seperti Bank Dunia, Pertubuhan Bangsa-Bangsa Bersatu (PBB) atau Pertubuhan Kerjasama Ekonomi dan Pembangunan (OECD).

"Kami tanya sudikah mereka berkongsi data mereka dengan kami kerana data-data itu akan membantu negara-negara terbabit," kata Setiausaha Agung Komanwel, Patricia Scotland.

Scotland yang memegang jawatan itu sejak 2018, turut menyeru negara anggota agar tidak melihat jauh dalam proses penambahbaikan sistem sedia ada.

"Saya tidak mempunyai wang untuk menyediakan algorithm yang diperlukan dalam hab ini, kerana kosnya kira-kira 1.8 juta pound.

"Kemudian saya disapa oleh seorang anak muda yang bertugas di bahagian ICT jabatan saya, beritahu saya dia boleh melakukannya. Cuma dia perlukan beberapa hari untuk sediakannya.

"Jadi dengan algorithm yang dia sediakan, kami ada satu hab inovasi dalam Komanwel," ujarnya.

Scotland berkata demikian ketika diwawancara oleh Ketua Pengarang Astro AWANI, Kamarul Bahrin Haron, dalam program Perspektif yang disiarkan pada Rabu.

Beliau berada di negara ini untuk menyertai forum Faith in the Commonwealth - Commonwealth Call For Peace, Understanding and Rahmah (Mercy) di ibu negara, minggu lalu.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/hab-inovasi-komanwel-bantu-negara-membangun-dalami-perkongsian-data-231071>